

23 SEP 1999

Mahathir-Islam

K'JAAN AKAN TENTUKAN KESUCIAN ISLAM TIDAK TERCEMAR, KATA PM

KUALA LUMPUR, 23 Sept (Bernama) -- Kerajaan akan terus melindungi dan menentukan agar kesucian agama Islam tidak tercemar dan diseleweng oleh mana-mana pihak semata-mata untuk kepentingan mereka, baik politik mahupun peribadi.

Perdana Menteri berkata jika mana-mana pihak mencemar dan menyeleweng agama Islam untuk kepentingan mereka, ia boleh memecah-belah dan melemahkan umat Islam.

Beliau berkata demikian ketika menyampaikan ucapan tahniah dan ikrar taat setia kerajaan dan rakyat di istiadat pertabalan Yang di-Pertuan Agong ke-11 di Istana Negara, di sini.

"Dalam hal agama, kerajaan Tuanku akan terus mendokong Islam sebagai agama rasmi negara di samping menjamin kebebasan beragama bagi penganut-penganut agama lain.

"Kerajaan akan meneruskan usaha menerapkan nilai-nilai Islam di dalam pentadbiran negara," kata Dr Mahathir.

Perdana Menteri berkata setakat ini, kejayaan negara di dalam menerapkan nilai-nilai Islam di dalam pentadbiran seperti memperkenalkan sistem perbankan Islam, insurans Islam dan lain-lain telah menjadi contoh dan diiktiraf oleh negara-negara Islam lain di dunia.

Dr Mahathir juga berkata kejayaan negara memulihkan ekonomi negara sehingga hari ini adalah disebabkan berkat kepercayaan dan sokongan rakyat terhadap langkah-langkah radikal yang diambil kerajaan.

"Sokongan padu ini membolehkan kerajaan memberi tumpuan penuh terhadap usaha pemulihan ekonomi di samping menggalakkan pelaburan dari dalam dan luar negara," katanya.

Dr Mahathir berkata kerajaan mahu melihat sektor swasta dapat memainkan peranan yang lebih aktif bagi meningkatkan kegiatan perniagaan dan perusahaan mereka supaya ekonomi negara dapat tumbuh semula seperti dahulu.

"Sesungguhnya perpaduan dan persefahaman di kalangan rakyat juga semakin erat," katanya.

Perdana Menteri berkata nyata sekali, kegawatan ekonomi telah menyedarkan rakyat tentang pentingnya mengekalkan keharmonian dan perpaduan kaum.

"Dasar Ekonomi Baru yang bertujuan mengagihkan kekayaan negara kepada Bumiputera dengan mengembangkan kek ekonomi negara tanpa merampas hak kaum-kaum lain, telah berjaya mengelak tercetusnya pergaduhan antara kaum yang disebabkan ketidakseimbangan tahap pencapaian ekonomi.

"Berbanding negara lain, konflik perkauman tidak wujud di negara kita," kata beliau.

Dr Mahathir berkata rakyat berlainan keturunan, agama, budaya, adat resam dan bahasa yang bersikap toleransi dan menghormati antara satu sama lain merupakan kunci kejayaan negara yang boleh dibanggakan.

"Perpaduan ini merupakan faktor penting yang membolehkan kerajaan terus menumpukan usaha membangunkan negara," kata beliau.

Mengenai persiapan menghadapi alaf baru, Dr Mahathir berkata kerajaan telah membuat banyak persediaan yang rapi agar rakyat dan negara dapat menempuhnya dengan penuh yakin dan berani.

Katanya pembinaan pusat pentadbiran kerajaan persekutuan baru di Putrajaya dan kawasan pembangunan, perusahaan dan penyelidikan teknologi maklumat bertaraf dunia di Cyberjaya adalah dua strategi kerajaan untuk memajukan pentadbiran negara dan memperlengkapkan rakyat dengan ilmu yang

canggih bagi mengharungi alaf baru yang lebih sofistikated dan penuh cabaran serta persaingan.

Dalam hubungan luar, Dr Mahathir berkata negara akan terus memainkan peranan aktif di dalam mempertingkatkan hubungan kerjasama dengan semua negara di dunia.

"Negara juga akan terus menumpukan kerjasama istimewa dengan negara-negara membangun dan meningkatkan hubungan Selatan-Selatan.

"Di samping itu, usaha meningkatkan aktiviti ekonomi akan diteruskan dengan rakan perdagangan tradisi menerusi penggalakkan pengaliran pelaburan asing masuk ke dalam negara," kata Dr Mahathir.

-- BERNAMA

TM LAT